



REPUBLIKA E SHQIPËRISË
PROKURORIA PRANË GJYKATËS SË SHKALLËS SË PARË TË JURIDIKSIONIT
TË PËRGJITHSHËM DIBËR

UDHËZIM I PËRGJITHSHËM

Nr. 51, datë 08.05.2024

PËR PËRGJIMET

Unë **Abaz MUÇA**, Drejtues i Prokurorisë pranë Gjykatës së Shkallës së Parë të Juridiksionit të Përgjithshëm Dibër, në mbështetje të neneve 42, 43, 46 dhe 52 të ligjit nr.97, të vitit 2016 “Për organizimin dhe funksionimin e Prokurorisë në Republikën e Shqipërisë”, të ndryshuar, neneve 4 dhe 5 të “Rregullores për organizimin dhe funksionimin e Prokurorisë pranë Gjykatës së Shkallës së Parë të Juridiksionit të Përgjithshëm Dibër”¹, nenit 221 e vijues të Kodit të Procedurës Penale, nenit 23 të ligjit nr.9157, datë 04.12.2003 “Për përgjimin e komunikimeve elektronike”, të ndryshuar dhe udhëzimit të përgjithshëm të Prokurorit të Përgjithshëm nr.4, datë 26.10.2018 “Për përgjimet”, me synim për të unifikuar:

- mënyrën e realizimit të përgjimit, si mjet i kërkimit të provës, duke garantuar liritë dhe të drejtat e njeriut,
- rregullat për lëvizjen, regjistrimin, ruajtjen e sekretit dhe të dokumentacionit të dalë nga procesi i përgjimit, si dhe ndalimin e publikimit të tij,
- mënyrën e asgjësimit të materjaleve të përgjimit,

U D H Ë Z O J:

Neni 1
Përkufizime

1. “**Sistemi i përgjimit të komunikimeve elektronike**” janë pajisjet e përgjimit që ndodhen të instaluar në vendin e caktuar në administrim të Prokurorisë së Përgjithshme².

2. “**Format e tjera të përgjimit**” mund të kryhen vetëm me anën e pajisjeve të instaluar në vende të caktuara, të autorizuara dhe të kontrolluara nga prokurori.

¹ Miratuar me urdhërin nr.37, datë 25.03.2024, të Drejtuesit të Prokurorisë pranë Gjykatës së Shkallës së Parë të Juridiksionit të Përgjithshëm Dibër.

² Shih nenin 38, pikën 2, gërmën “j”, të ligjit nr.97, të vitit 2016 “Për organizimin dhe funksionimin e Prokurorisë në Republikën e Shqipërisë”, të ndryshuar.

3. **“Material i përgjuar”** është çdo material i regjistruar në audio, kompjuter/server apo letër me anë të procesit të përgjimit, si dhe çdo fragment (pjesë e shkëputur), kopje e pjesshme ose përmbledhje e materialit të identifikuar si produkt i procesit të përgjimit procedural penal.

4. **“Parimi i proporcionalitetit”** është ballancimi i të drejtës ndërmjet interesit të përgjithshëm në ndjekjen penale në një çështje dhe mbrojtjes së të drejtave themelore të individit. Në respektimin e këtij parimi, prokurori, në çdo rast, duhet të shqyrtojë dhe vlerësojë nëse masa e marrë prej tij ose masa që ai i kërkon gjykatës është në proporcion me objektivin që synohet për të arritur me anë të përgjimit.

5. **“Vende private”** konsiderohen vendet ku personit i garantohet e drejta e jetës private, e cila nënkupton “të drejtën për të jetuar ashtu siç do vetë personi në të gjitha situatat, pa iu ekspozuar publicitetit për çdo gjë që ka të bëjë me shëndetin e personit, me bindjet e tij filozofike, fetare, morale, me jetën familjare dhe sentimentale, me lidhjet miqësore, si dhe me jetën profesionale dhe material” (koment i nenit 8 të Konventës Evropiane “Për liritë dhe të drejtat themelore të njeriut”).

6. **“Vende publike”** është një hapësirë publike në të cilën ka akses kushdo, pa asnjë formalitet, duke qenë një hapësirë që përdoret me një qëllim të posaçëm ose një qëllim kryesor ose vendi i lirë nga e drejta dhe fakti për të gjithë ose për një numër të papërcaktuar personash.

Neni 2

Garancitë e komunikimit dhe objektivat e përgjimit

1. Liria dhe fshehtësia e korespondencës ose e çdo mjeti tjetër komunikimi janë të garantuara³. Kufizimi i kësaj të drejte⁴ bëhet për të mbrojtur interesat publike ose për të mbrojtur të drejtat e personave të tjerë, duke respektuar parimet e nevojshmërisë, proporcionalitetit, ruajtjes së sekretit dhe objektivitetit në kryerjen e tij.

2. Përgjimi - ndërhyrja e fshehtë për të kapur, dëgjuar dhe regjistruar përmbajtjen e komunikimit dhe të dhëna që lidhen me të, ndërmjet pikës së nisjes dhe pikës së mbërritjes - si metodë e posaçme hetimore të përdoret si një mjet i efektshëm për kërkimin e provës, duke plotësuar kushtet e parashikuara në ligj⁵.

3. Përgjimet e komunikimeve elektronike, ambientale ose në forma të tjera të kryhen në kushte sa më të natyrshme, me synim për të rritur efektivitetin e këtij mjeti për sigurimin e provave, identifikimin e veprimtarisë kriminale dhe të autorëve të saj, si dhe vënien e tyre para drejtësisë.

Neni 3

Kushtet për të autorizuar përgjimet

1. Përgjimi i komunikimeve elektronike të një personi, të një numri telefoni me telefon, faks kompjuter ose me mjete të tjera të çdo lloji, përgjimi i fshehtë me mjete teknike i bisedave në vende private, përgjimi me audio dhe video në vende private, lejohen vetëm kur procedohet:

³ Shih nenin 36 të Kushtetutës së Republikës së Shqipërisë.

⁴ Shih nenin 17 të Kushtetutës së Republikës së Shqipërisë dhe nenet 221-226 të Kodit të Procedurës Penale.

⁵ Shih nenin 221 të Kodit të Procedurës Penale.

a) për krimet e kryera me dashje, për të cilat parashikohet denim me burgim jo më pak, në maksimum, se shtatë vjet;

b) për çdo vepër penale me dashje kur kryhet me anën e mjeteve të telekomunikimit apo përdorimit të teknologjive informatike ose telematike.

2. Regjistrimi i fshehtë fotografik, filmik ose me video i personave në vende publike dhe përdorimit i pajisjeve gjurmuese të vendndodhjes lejohen vetëm kur procedohet për vepra të kryera me dashje, për të cilat parashikohet denim me burgim jo më pak, në maksimum, se tre vjet.

3. Përgjimi mund të urdhërohet kundër:

a) të dyshuarit përkryerjen e një vepre penale;

b) personit që dyshohet se merr ose transmeton komunikime nga i dyshuari;

c) personit që merr pjesë në transaksione me të dyshuarin;

ç) personit, vëzhgimi i të cilit mund të çojë në zbulimin e vendndodhjes ose të identitetit të tëdyshuarit.

4. Rezultati i përgjimit është i vlefshëm për të gjithë komunikuesit.

5. Përgjimi parandalues rregullohet me ligj të veçantë. Rezultatet e tij nuk mund të përdoren si provë.

Neni 4

Kërkesa dhe kushtet për autorizimin e përgjimit

1. Përgjimi për rastet e lejuara në nenin 221, pika 1, të Kodit të Procedurës Penale, kërkohet nga prokurori vetëm kur sigurohet për ekzistencën e kushteve bazë që janë:

a) Përgjimi është i domosdoshëm për vazhdimin e hetimeve të filluara;

b) Kur në ngarkim të personit ekziston një dyshim i arsyeshëm dhe i bazuar në prova se ka kryer ose është në kryerje e sipër të një vepër penale që përmbush kushtet për t'u autorizuar përgjimi sipas nenit 3 të këtij udhëzimi.

2. Vetëm konstatimi i ekzistencës njëkohësisht të këtyre kushteve mund të vlerësojë të ligjshëm lëshimin e autorizimit për përgjim.

Neni 5

Kompetenca për të autorizuar përgjimet

Kompetenca e përgjimit, në kushte normale, gjatë hetimeve paraprake, realizohet, si më poshtë:

1. Me kërkesën e prokurorit, për rastet e lejuara në paragrafin 1, të nenit 221, të Kodit të Procedurës Penale, gjykata autorizon përgjimin me vendim të arsyetuar, kur ai është i domosdoshëm për vazhdimin e hetimeve të filluara dhe kur në ngarkim të personit ekziston një dyshim i arsyeshëm dhe i bazuar në prova se ka kryer një vepër penale.

2. Kur ka arsye të bazuara për të menduar se nga vonesa mund t'i vijë një dëm i rëndë hetimeve dhe plotësohen kushtet e paragrafit 1, të këtij neni, prokurori vendos përgjimin me akt të motivuar dhe njofton gjykatën menjëherë, por jo më vonë se njëzet e katër orë nga marrja e vendimit. Kur vlefësimi nuk bëhet në afatin e caktuar, përgjimi nuk mund të vazhdojë dhe rezultatet e tij nuk mund të përdoren.

3. Kur njëri nga dy personat që do të përgjohen është i gatshëm të kryejë dhe të regjistrojë veprimin përkatës, sipas marrëveshjes me oficerin e policisë gjyqësore, veprimi lejohet me autorizim të prokurorit.

4. Në rastet e parashikuara në paragrafët 1, 2 dhe 3 të këtij neni, gjykata merr vendim të arsyetuar në dhomë këshillimi, brenda 24 orëve nga paraqitja e kërkesës së prokurorit. Kundërvendimit që refuzon kërkesën për përgjim mund të bëhet ankim i veçantë në gjykatën e apelit brenda 24 orëve. Gjykata e apelit shqyrton ankimin brenda 48 orëve nga marrja e akteve. Paraqitja e kërkesës për vleftësimin e përgjimit nuk shkakton ndërprerjen e tij.

5. Vendimi për përgjimin tregon mënyrën e kryerjes dhe kohëzgjatjen e veprimeve, e cila nuk mund t'i kalojë pesëmbëdhjetë ditët. Ky afat, me kërkesë të arsyetuar të prokurorit, mund të zgjatet nga gjykata sa herë është e nevojshme, për një periudhë prej 15 ditësh, kur ekzistojnë kushtet e parashikuara në paragrafin 1 të këtij neni, dhe rezultatet e përgjimit diktojnë nevojën e zgjatjes së afatit.

6. Në vendimin e gjykatës për përgjimin e fshehtë fotografik ose me video, ose për përgjimin e bisedave në vende private mund të autorizohet oficeri i policisë gjyqësore ose specialisti i kualifikuar për të hyrë në këto vende, në mënyrë të fshehtë, duke vepruar në përputhje me vendimin. Ky autorizim duhet të zbatohet brenda 15 ditëve.

7. Në regjistrin që mbahet në prokurori shënohen aktet që urdhërojnë, autorizojnë, vleftësojnë ose zgjasin përgjimet, si dhe fillimin e mbarimin e veprimeve të çdo përgjimi.

8. Në rastet e parashikuara nga neni 221, paragrafi 2, i Kodit të Procedurës Penale, veprimi autorizohet nga prokurori.

Neni 6

Kërkimi i personit që nuk gjendet

1. Përgjimi i bisedave telefonike dhe formave të tjera të komunikimit mund të aplikohet edhe ndaj personit të cilit i është marrë masa e sigurimit parashikuar nga nenet 233, 235, 237 dhe 238 të Kodit të Procedurës Penale, ose dënuar me burgim e nuk gjendet dhe gjykata ka deklaruar ikjen e tij.

2. Për të lehtësuar kërkimin e personit të ikur, mbi kërkesën e prokurorit gjykata mund të urdhërojë përgjimin e komunikimeve elektronike⁶.

Neni 7

Veprimet e përgjimit

1. Veprimet e përgjimit mund të kryhen vetëm me anën e pajisjeve të instaluar në vende të caktuara, të autorizuar dhe të kontrolluara nga prokurori.

2. Kryerja e përgjimit dhe procesverbalet e transkriptimit bëhen nga oficerë të policisë gjyqësore, nën drejtimin dhe kontrollin e prokurorit të çështjes.

3. Prokurori i Prokurorisë pranë Gjykatave të Shkallës së Parë të Përgjithshëm Dibër, me akt zyrtar, bashkëshoqëron dhe komunikon vendimin e gjykatës në strukturën e përgjimit të komunikimeve elektronike pranë Prokurorisë së Përgjithshme për ekzekutimin e tij.

⁶ Shih nenin 247 të Kodit të Procedurës Penale.

4. Kur ka dyshime të bazuara dhe të arsyetuara se njëri nga kushtet e përgjimit nuk ekziston më, organi procedues njofton menjëherë prokurorin, i cili vlerëson dhe urdhëron ndalimin e përgjimit dhe vë në dijeni gjykatën, kur urdhri është dhënë nga gjykata.

5. Kopja e urdhërit për ndalimin e përgjimit menjëherë i dërgohet Strukturës së Përgjimit të Komunikimeve Elektronike përkatëse.

6. Me marrjen e njoftimit për ndalimin e përgjimit, administratori i Sistemit të Përgjimit, menjëherë, ndërpret përgjimin.

7. Komunikimet e përgjuara regjistrohen dhe për veprimet e kryera mbahet procesverbal.

Neni 8

Regjistri i përgjimit

1. Në Prokurorinë pranë Gjykatave të Shkallës së Parë të Përgjithshëm Dibër të mbahet një regjistër i unifikuar i emërtuar “Regjistri për Përgjimet i Prokurorisë pranë Gjykatave të Shkallës së Parë të Përgjithshëm Dibër”. Paraprakisht, regjistri sekretohet duke numërtuar të gjitha fletët e tij.

2. Personi i ngarkuar për administrimin e këtij regjistri, mban sipas renditjes kronologjike të tyre, gjithë aktet, vendimet ose urdhërat, me të cilat është autorizuar, është vlerësuar ose është zgjatur afati i përgjimeve, është ndaluar përgjimi dhe kohën e fillimit dhe të përfundimit të çdo përgjimi⁷.

3. Regjistri duhet të plotësohet në kohë dhe me saktësi në të gjithë ekstremitetet e tij, për të shmangur abuzimet dhe pavlefshmëritë që mund të ngrihen për këtë shkak nga palët e interesuara.

4. Krahas të dhënave të mësipërme, për çdo procedim në të cilin kryhen përgjime, prokurori i ngarkuar me mbajtjen e regjistrit të përgjimeve formon një fashikull të veçantë ku ruhen të gjitha aktet që urdhërojnë, autorizojnë, vleftësojnë, zgjatin apo ndërpresin përgjimet. Për secilin numër telefonik të përgjuar, formohen nënfashikuj ku aktet renditen sipas rendit kronologjik të veprimeve të kryera.

5. Prokurorët që drejtojnë hetimet paraprake ku janë urdhëruar përgjime, detyrohen t'i dorëzojnë sekretarit të ngarkuar me mbajtjen e protokollit, një kopje të akteve që dorëzojnë tek oficerët e përgjimeve, menjëherë dhe gjithsesi jo më vonë se 48 orë pas formulimit të tyre. Sekretari dhe prokurori i ngarkuar me mbajtjen e regjistrit të përgjimeve shënojnë në akt datën dhe orën e marrjes së tyre.

6. Me depozitim të akteve të përgjimit, me qëllim njohjen me përmbajtjen e tyre të mbrojtësit të të pandehurit, njoftohet prokurori për të kryer shënimet në regjistrin e përgjimeve.

7. Në përfundim të hetimeve paraprake, fashikulli i akteve të përgjimeve, me inventarin përkatës, arkivohet.

8. Në përfundim të gjykimit të çështjes, në të njëjtën mënyrë dhe bashkë me fashikullin e akteve të përgjimit, arkivohen edhe CD ose shiritat magnetikë që përmbajnë bisedat e regjistruara.

9. Fashikulli i akteve të përgjimeve dhe CD apo shiritat magnetikë kanë karakter konfidencial. Ato mund të konsultohen vetëm me autorizim të prokurorit të çështjes. Në raste

⁷ Shih nenin 222, pikën 5, të Kodit të Procedurës Penale.

të tilla, mbahet procesverbal nga arkivistja, ku nënshkruajnë personat që janë njohur me aktet dhe dokumentet fonografikë. Procesverbali ruhet së bashku me aktet e fashikullit. I njëjti rregull vlen edhe për transkriptimet që ndodhen në fashikullin e prokurorit.

10. Në përfundim të tij, regjistri i përgjimeve arkivohet dhe hapet një regjistër i ri. Për ruajtjen e regjistrit të përfunduar vlejnë rregullat e parashikuara në pikën 9 të këtij neni.

11. Prokurorët, që drejtojnë hetimin e procedimeve, ku janë urdhëruar përgjime, duhet t'i dorëzojnë prokurorit të ngarkuar me mbajtjen e regjistrit të përgjimeve, të gjitha aktet e përgjimeve, të renditura sipas numrave telefonikë të përgjuar, në rend kronologjik.

Neni 9

Procesverbali i transkriptimit

1. Në përfundim të procesit të përgjimit, sipas afateve të përcaktuara, oficerët e policisë gjyqësore bëjnë transkriptimin në procesverbal të komunikimeve të përgjuara. Transkriptohet përmbajtja e bisedave që janë regjistruar⁸.

2. Transkriptimi që bën oficeri i policisë gjyqësore i specializuar, duhet të jetë i detajuar që të ndihmojë për të kuptuar bisedën që është dëgjuar, duke e shkruar siç është dëgjuar si dhe regjistrimin në CD-DVD.

3. Procesverbali i transkriptimit dhe CD-DVD përkatëse me një akt zyrtar të Strukturës së Përgjimit të Komunikimeve Elektronike i dërgohet menjëherë prokurorisë përkatëse.

4. Në hartimin e procesverbalit, duhet të tregohet kujdesi i duhur, për të fiksuar:

a) Në pjesën hyrëse tregohet:

- vendi, data dhe personi, oficeri i policisë gjyqësore, që ka kryer transkriptimin;
- numri dhe data e vendimit që ka autorizuar përgjimin dhe baza ligjore e veprimit të fiksimit në procesverbal;
- ambienti ose telefoni stacionar, celular a në rrjetë ose mjete të komunikimit të përgjuar;
- data dhe ora e fillimit dhe e ndërprerjes së përgjimit;
- mënyra e kryerjes së regjistrimit të bisedave ose komunikimeve.

b) Në pjesën përshkuese tregohet:

- përmbajtja e bisedave që janë regjistruar, me detajimet e nevojshëm e që ndihmojnë për të kuptuar bisedën që është dëgjuar;
- bisedat e veçanta që janë përgjuar, duke respektuar rendin kronologjik, kohën e kryerjes së tyre dhe emërtimi e pajisjes (CD, DVD, etj) ku ato janë regjistruar;
- inicialet e personave të njohur objekt përgjimi dhe për bashkëbiseduesit;
- biseda duhet të shkruhet siç është dëgjuar, me difektet në shqiptim, etj. Kjo është shumë e rëndësishme dhe lidhet me objektivitetin e transkriptimit.

c) Në pjesën e përfundimit, tregohet:

- përshkrimi i pajisjes (CD, DVD, etj) ku ato janë regjistruar që u transkriptuan;
- ora e fillimit dhe e përfundimit të transkriptimit dhe nënshkrimi.

5. Procesverbalet dhe regjistrimet i dorëzohen menjëherë prokurorit dhe brenda pesë ditëve nga mbarimi i veprimeve ato depozitohen në sekretari bashkë me aktet që kanë urdhëruar, autorizuar, vleftësuar dhe zgjatur përgjimin.

⁸ Shih nenin 223, pikën 2, të Kodit të Procedurës Penale.

6. Në rastet kur nga depozitimi i akteve në sekretari mund të dëmtohen hetimet dhe mbi kërkesën e prokurorit gjykata autorizon që të shtyjë depozitimin deri në përfundimin e hetimeve paraprahe, procesverbali dhe regjistrimet administrohen në fashikullin e prokurorit.

7. Në rastet kur gjykata nuk pranon kërkesën e prokurorit për të shtyrë depozitimin dhe ai vlerëson se depozitimi në sekretari dëmton vazhdimësinë e hetimeve, bazuar në nenin 279⁹ të Kodit të Procedurës Penale, prokurori me vendim të arsyetuar urdhëron ndalimin e publikimit të përmbajtjes së procesverbaleve dhe regjistrimeve të përgjimit deri në përfundim të hetimeve.

8. Mbrojtësit dhe përfaqësuesit e palëve lajmërohen menjëherë sipas rastit, si për depozitimin në sekretari dhe për të drejtën që kanë për të shqyrtuar aktet e për të dëgjuar regjistrimet, ashtu dhe për ndalimin¹⁰ e publikimit të tyre deri në përfundim të hetimeve.

9. Procesverbalet e transkriptimeve futen në fashikullin e gjykimit¹¹ bashkë me vendimin¹² e prokurorit që ka urdhëruar ndalimin e publikimit të përmbajtjes së tyre dhe/ose detyrimin për të ruajtur sekretin.

Neni 10

Ndihma e ekspertëve të fushave përkatëse

1. Në hetimet paraprahe kur ka pretendime për vërtetësinë e rezultateve të përgjimit, prokurori mund të kërkojë ndihmën e eksperteve të fushave përkatëse me synim:

- a) Për përcaktimin e seksit;
- b) Për përcaktimin nëse zëri është origjinal apo i manipuluar;
- c) Për identifikimin e personit në bazë të zërit dhe të folurit;
- ç) Për kthimin e bisedave të bëra në gjuhë të huaj, etj.

Neni 11

Rregullat për ruajtjen e sekretit të përgjimit

1. Të gjithë aktet procedurale penale, pajisjet/regjistrimet (CD, DVD, etj), regjistrat dhe shkresat përcjellëse që lidhen me përgjimet janë dokumenta “Sekret hetimor”, deri në momentin kur u bëhen të njohura mbrojtësve dhe përfaqësuesit të palëve.

2. Oficerët e policisë gjyqësore, krahas detyrimit për përgatitjen në kohë të transkripteve të shkruara të materialit të përgjuar, duhet të garantojnë ruajtjen e sekretit dhe dërgimin e menjëhershëm të tyre subjektit që ka kërkuar përgjimin.

3. Numri i personave, të cilët mund të njihen me materialin e përgjuar duhet të jetë i kufizuar dhe secili person të nënshkruajë në regjistër se është njohur me aktin/materjalin përkatës.

4. Materiali i përgjuar nuk duhet t'i vihet në dispozicion asnjë personi, i cili nuk ka kërkesë zyrtare ose nuk është i autorizuar për të marrë këtë informacion.

⁹ Shih nenin 279, pikën 3, të Kodit të Procedurës Penale, në lidhje me nenin 103, pikat 1 dhe 2, të Kodit të Procedurës Penale dhe nenin 295/a§3 të Kodit Penal.

¹⁰ Shih nenin 279, pikën 3, të Kodit të Procedurës Penale.

¹¹ Shih nenet 223, pikën 5, 331 dhe 332/ë, gërma “f”, të Kodit të Procedurës Penale.

¹² Shih nenin 279, pikën 3, të Kodit të Procedurës Penale.

5. Oficeri i policisë gjyqësore, kërkesat/aktet e lidhura me përgjimin të klasifikuara “Sekret hetimor”, i mbyll në zarf të vulosur ku shënon ekstremitetet e kërkesës/aktit (nr.prot, datën dhe prokurorit që i drejtohet) dhe nëpërmjet sekretarisë e dëRgon në prokurorinë përkatëse.

6. Sekretaria e prokurorisë përkëtesë, në këto raste protokollon ekstremitetet e të dhënave të pasqyruara në zarf dhe zarfin e pahapur ia kalon vetëm prokurorit që i adresohet praktika.

7. Prokurori që ndjek procedimin, kërkesat/aktet e lidhura me përgjimin, të cilat i dërgon në gjykatë ose në institucione të tjera të autorizura, i mbyllë në zarf të vulosur ku shënon ekstremitetet e aktit (nr.prot, datën dhe institucionit që i drejtohet) dhe nëpërmjet sekretarisë ia dërgon gjyqtarit ose institucionit përkatës.

8. Gjatë procesit të përgjimit deri në përfundimit të tij, prokurori që ndjek çështjen ose oficeri i policisë gjyqësore i autorizuar prej tij mund të kërkojnë të njihet me rezultatet e përgjimit në dinamikën e këtij procesi dhe me kopje të të gjithë transkripteve të nxjerra.

9. Struktura e Përgjimit të Komunikimeve Elektronike ruan në Serverat e Sistemit të Përgjimit materialin përftuar gjatë përgjimit deri në kohën kur merr njoftim për asgjësimin e materjalit të urdhëruar nga gjykata, sipas rregullave që parashikojnë nenet 224 dhe 226/3 të Kodit të Procedurës Penale.

10. Prokurori që ka kërkuar përgjimin dhe çdo person tjetër që zotëron materialin e përgjuar është i detyruar:

a) Të garantojë që materiali i jepet vetëm personave që kanë një kërkesë zyrtare për ta marr atë;

b) Të sigurohet që personat që janë njohur dhe/ose u janë dhënë kopje të procesverbalit të transkriptit kanë nënshkruar si në regjistrin përkatës, ashtu dhe deklaratën për ruajtjen e sekretit dhe ndalimin e publikimit.

11. Administrimi, ruajtja, nxjerrja dhe asgjësimi i tij bëhet në zbatim nenit 223/4 e vijues të Kodit të Procedurës Penale, si dhe të këtij udhëzimi të përgjithshëm.

12. Ruajtja e sekretit në realizimin e përgjimit, që në momentin e inicimit të kërkesës për përgjim nga oficeri i policisë gjyqësore, deri në momentin kur bëhet lajmërimi i mbrojtësit apo përfaqësuesit të palëve për tu njohur me to, si dhe ndalimi i publikimit të materjaleve të përgjimit me vendim të arsyetuar të prokurorit, i cili sipas rastit mund ti dërgohet për zbatim edhe entit publike apo medias, janë mjeti kryesor për arritjen e qëllimit në përmbushje të detyrimeve ligjore të parashikuara në nenet 103¹³, 104¹⁴ dhe 279¹⁵ të Kodit të Procedurës Penale dhe nenit 295/a¹⁶ të Kodit Penal.

13. Në rastet kur konstatohet se personi fizik apo personi juridik (media) ose subjekti i procedimit ka zbuluar aktet sekrete të përgjimit ose të dhënat që përbajnë aktet apo pajisjet e përgjimit, duke mos u repektuar detyrimi për ruajtjen e sekretit apo ndalimin e publikimit të aktit sipas përcaktimeve në nenin 103 në lidhje me nenin 279 të Kodit të Procedurës Penale, Drejtuesi i Prokurorisë pranë Gjykatës së Shkallës Parë të Juridiksionit të Përgjithshëm Dibër ose prokurori i autorizuar prej tij, me marrjen dijeni për veprën penale, me iniciativën e vet, duhet të regjistrojë kryesisht procedimin penal për veprën penale të parashikuar nga neni

¹³ Shih nenin 103 të Kodit të Procedurës Penale.

¹⁴ Shih nenin 104 të Kodit të Procedurës Penale.

¹⁵ Shih nenin 279 të Kodit të Procedurës Penale.

¹⁶ Shih nenin 295/a§3 të Kodit Penal.

295/a§3 i Kodit Penal dhe të merren masat e duhura për kryerjen e hetimeve dhe ushtrimin e ndjekjes penale ndaj subjektit/subjekteve të posaçme dhe/ose ndaj personave përgjegjës, duke garantuar procesin e rregullt ligjor.

Neni 12

Mënyra e ruajtjes dhe asgjësimit të materialeve të përgjimit

1. Pajisjet (CD, DVD, etj) ku janë regjistruar bisedat e transkriptuara në cilësinë e provës materjale, ruhen në vende të veçanta¹⁷ (fashikullin e prokurorit) në prokurorinë që ka urdhëruar përgjimin dhe në serverat e Strukturës së Përgjimit të Komunikimeve Elektronike, derisa vendimi të marrë formë të prerë, me përjashtim të atyre që ndalohej përdorimi.

2. Kur pajisjet (CD, DVD, etj) ku janë regjistruar bisedat e transkriptuara nuk janë të nevojshme dhe mbi kërkesën e të interesuarit gjykata¹⁸ që ka bërë vleftësimin e përgjimit vendos asgjësimin e tij, proces i cili realizohet nga prokurori që ndjek procedimin, nën kontrollin e gjyqtarit dhe për veprimin mbahet procesverbal.

3. Në rastet kur prokurori në përfundim të hetimeve që ka përdorur përgjimin i kërkon gjykatës pushimin e çështjes, në kërkesë duhet të njoftojë gjykatën edhe për asgjësimin e procesverbaleve dhe regjistrimeve, e cila kur pranon kërkesën për pushimin e çështjes vendos¹⁹ edhe për asgjësimin e procesverbaleve dhe regjistrimeve në afatin e caktuar prej saj dhe vë në dijeni personin e përgjuar.

4. Në këto raste kur prokurori²⁰ vlerëson se njoftimi i personit mund të shkaktojë rrezik për jetën ose shëndetin e të tjerëve ose mund të vihet në rrezik një hetim i nisur, krahas njoftimit me shkrim ai i kërkon gjykatës që për këto arsye të mos bëhet njoftimi i personit të përgjuar dhe mbi këtë kërkesë vendosë gjykata.

5. Në çdo rast, asgjësimi i materialit të përgjimit kryhet në prani të një gjyqtari ose një personi tjetër të autorizuar për këtë qëllim. Gjyqtari ose personi i pranishëm vërtetojnë këtë fakt me procesverbalin e asgjësimit, një kopje e të cilës i dërgohet gjykatës dhe një kopje vendoset në fashikullin e hetimeve paraprake.

6. Materiali i përgjuar do të asgjësohet ose shkatërrohet fizikisht në mënyrat e parashikuara, si më poshtë:

a) Çdo material përgjimi i printuar digjet - shkrumbohët;

b) Çdo material përgjimi në formë elektronike i ruajtur në foldera-dosje në kompjuter ose server fshihet;

c) Çdo material përgjimi i regjistruar në audio fshihet dhe shkatërrohet.

7. Në rastet kur vendoset ruajtja e materialit të përgjuar, për faktin se rezultatet e tij mund të përdoren në procedime të tjera sepse janë të domosdoshme për hetimin e krimeve, në bazë të nenit 225 të Kodit të Procedurës Penale, procesverbalet dhe regjistrimet e përgjimeve depozitohen në organin tjetër që procedon ose në fashikullin e hetimeve për këto krime.

¹⁷ Shih nenet 224, pikën 1 dhe 331, pikën 4, të Kodit të Procedurës Penale.

¹⁸ Shih nenin 224, pikën 1, të Kodit të Procedurës Penale.

¹⁹ Shih nenin 224, pikën 2, të Kodit të Procedurës Penale.

²⁰ Shih nenin 224, pikën 2, të Kodit të Procedurës Penale.

Neni 13

Përdorimi i rezultateve të përgjimit

Përgjimi i bisedimeve, komunikimeve elektronike dhe i formave të tjera të komunikimit është i vlefshëm dhe i përdorshëm për të gjithë komunikuesit, dmth si për personin objekt përgjimi ashtu dhe për personat e tjerë që komunikojnë me të²¹.

Neni 14

Përdorimi i rezultateve të përgjimit në procedime të tjera

Rezultatet e përgjimit kanë vlerë dhe mund të përdoren për procedime të ndryshme, dmth në procedime të tjera, si përjashtim nga rregulli i përgjithshëm, por vetëm kur ato janë të domosdoshme për hetimin e krimeve²². Në këto raste, procesverbalet dhe regjistrimet e përgjimeve, i dorëzohen autoritetit tjetër që procedon.

Neni 15

Ndalimi i përdorimit

1. Rezultatet e përgjimit nuk mund të përdoren kur janë bërë jashtë rasteve të lejuara nga ligji²³ ose kur nuk janë respektuar dispozitat e Seksionit IV “Përgjimet” të Kreut III të Kodit të Procedurës Penale.

2. Prokurorët duhet të bëjnë kujdes në vlerësimin e rasteve që ndalohet dhe nuk mund të përdoren rezultatet e përgjimit të bisedave ose komunikimeve, të cilët mund të jenë në rastet kur:

- a) Përgjimet janë kryer jashtë rasteve të lejuara me ligj;
- b) Nuk janë respektuar dispozitat e parashikuara në nenet 221-226 të Kodit të Procedurës Penale, për përgjimet;
- c) Personat që janë përgjuar kanë detyrim ligjor të ruajnë sekretin për shkak të profesionit ose detyrës²⁴, si, përfaqësuesit e besimeve fetare, avokatët, noterët, përfaqësuesit ligjor, mjekët, farmacistët, etj, duke përjashtuar rastet kur këto persona kanë dhënë shpjegime për të njëjtat fakte, ose kur i kanë përhapur ato në ndonjë mënyrë tjetër²⁵.
- ç) Nëpunësit shtetërorë, nëpunësit publik që administrojnë fakte sekret shtetëror²⁶, duke përjashtuar rastet kur këto persona kanë dhënë shpjegime për të njëjtat fakte, ose kur i kanë përhapur ato në ndonjë mënyrë tjetër²⁷.

²¹ Shih nenin 221, pikën 4, të Kodit të Procedurës Penale.

²² Shih nenin 225 të Kodit të Procedurës Penale.

²³ Shih nenin 226 të Kodit të Procedurës Penale në lidhje me kushtet e afatet e parashikuara nenet 221, pikat 1, 2 dhe 3 dhe 222 të Kodit të Procedurës Penale.

²⁴ Shih nenin 226 të Kodit të Procedurës Penale në lidhje me nenin 159 të Kodit të Procedurës Penale.

²⁵ Shih nenet 226, 52, pikën 4, 159 dhe 160 të Kodit të Procedurës Penale.

²⁶ Shih nenin 226 të Kodit të Procedurës Penale në lidhje me nenet 159 dhe 160 të Kodit të Procedurës Penale.

²⁷ Shih nenet 226, 52, pikën 4, 159 dhe 160 të Kodit të Procedurës Penale.

3. Regjistrimet dhe procesverbalet e përgjimit që do të konsiderohen si të papërdorshëm, me urdhër të gjykatës në çfarë do gjendje apo faze të procedimit penal kryhet asgjesimi i tyre, me përjashtim të faktit kur këto përbëjnë provë materiale²⁸.

Neni 16

Pavlefshmëria absolute dhe/ose relative

1. Prokurorët të verifikojnë vlefshmerinë e përgjimit të kryer në procedura normale ose në procedura të ngutëshme, duke vlerësuar respektimin e dispozitave përkatëse mbi përgjimin.

2. Përgjimi mund të jetë apsolutisht i pavlefshëm, në rastet kur:

a) Është kryer jashtë rasteve të lejuara me ligj;

b) Nuk janë respektuar dispozitat e parashikuara në këtë seksion, për përgjimin e bisedave ose komunikimeve sipas neneve 226/1-3 Kodit të Procedurës Penale në lidhje me nenet 122, 128 e vijues të Kodit të Procedurës Penale.

3. Përgjime relativisht të pavlefshme mund të jenë në rastet kur evidentohen gabime materjale ose mungesa firme në regjistrin e përgjimeve që mban prokurori ose në procesverbalet e transkriptimit të oficerit të policisë gjyqësore sipas neneve 222, 223/2 dhe 129 të Kodit të Procedurës Penale.

Neni 17

Shfuqizime

Shfuqizohet çdo akt tjetër për pjesën që bie në kundërshtim me këtë udhëzim.

Neni 18

Zbatimi

Ky udhëzim i përgjithshëm është i detyrueshëm për zbatim prokurorët dhe oficerët e policisë gjyqësore në strukturat hetimore të shërbimeve dhe të seksioneve në Prokurorinë pranë Gjykatës së Shkallës së Parë të Juridiksionit të Përgjithshëm Dibër, si dhe personeli i Prokurorisë pranë Gjykatës së Shkallës së Parë të Juridiksionit të Përgjithshëm Dibër.

Neni 19

Hyrja në fuqi dhe publikimi

Ky udhëzim i përgjithshëm hyn në fuqi menjëherë pas nënshkrimit dhe depozitimit në sekretari dhe publikohet në faqen e internetit të Prokurorisë pranë Gjykatës së Shkallës së Parë të Juridiksionit të Përgjithshëm Dibër.

DREJTUESI

ABAZ MUÇA

²⁸ Shih nenet 226, pikën 3, të Kodit të Procedurës Penale.